



Ein cyf: LG/0284/19

Mike Hedges AC
Y Pwyllgor Newid Hinsawdd, Amgylchedd a Materion Gwledig
Cynulliad Cenedlaethol Cymru

Mike.Hedges@cynulliad.cymru

25 Gorffennaf 2019

Annwyl Mike

Adroddiad y Pwyllgor Newid Hinsawdd, Amgylchedd a Materion Gwledig ar y Memorandwm Cydsyniad Deddfwriaethol ar Fil Amaethyddiaeth y DU

Diolch i chi am sylw ac adroddiadau'r Pwyllgor ar y Memorandwm Cydsyniad Deddfwriaethol (LCM) a'r Memorandwm Cydsyniad Deddfwriaethol Atodol (SLCM) mewn perthynas â Bil Amaethyddiaeth y DU.

Rydw i wedi ystyried argymhellion y Pwyllgor yn ofalus ac mae swyddogion yn gweithio gyda Llywodraeth y DU a gweinyddiaethau eraill ar becyn i fynd i'r afael â phryderon. Byddwch yn gwerthfawrogi bod hyn yn golygu trafodaethau cymhleth ond rwy'n fodlon â'r cynnydd a wnaed. Rwy'n darparu'r wybodaeth y gallaf ei rhoi ar hyn o bryd yn yr atodiad i'r llythyr hwn. Hoffai fy swyddogion ddarparu briff technegol ar y materion sy'n destun trafodaeth o hyd os byddech yn gweld hynny'n ddefnyddiol. Fel y gwyddoch, mae'r Bil wedi'i ohirio yn Senedd y DU ar hyn o bryd a byddaf yn rhoi ymateb llawn pan fydd y Bil yn mynd ar ei hynt. Yn ogystal, rwy'n bwriadu diweddarau'r Nodiadau Esboniadol i'r Bil a gosod gerbron y Cynulliad Ddatganiad Esboniadol i ategu'r Memoranda Cydsyniad Deddfwriaethol. Bydd y Datganiad Esboniadol yn rhoi gwybodaeth ychwanegol am y Bil, gan gynnwys cynigion ar sut bydd y pwerau i wneud rheoliadau yn cael eu defnyddio, cyfiawnhau'r gweithdrefnau, a'r dulliau o sicrhau tryloywder a chyfranogiad y Cynulliad Cenedlaethol.

Hoffwn dynnu sylw at rannau penodol o'r pecyn i ddangos fy ymrwymiad i dryloywder, fy mharch at rôl y Cynulliad o ran craffu ar ddeddfwriaeth a fy mod i wedi gwrandao ac ystyried barn y Cynulliad.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1NA

Gohebiaeth.Lesley.Griffiths@llyw.cymru
Correspondence.Lesley.Griffiths@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Bil Amaethyddiaeth Cymru

Rwy'n cadarnhau ei bod yn dal yn fwriad gennyf gymryd y pwerau yn Atodlen 3 Bil y DU. Mae angen y pwerau hyn fel y gallwn ddechrau symud i systemau cymorth newydd pan fyddwn yn barod i wneud hynny.

Mae fy ymrwymiad i gyflwyno Bil Amaethyddiaeth Cymru yn parhau ac mae'r Prif Weinidog wedi rhoi'r wybodaeth ddiweddaraf am ein cynlluniau fel rhan o'i ddatganiad ar Raglen Ddeddfwriaethol y Llywodraeth ar 16 Gorffennaf. Bydd Bil Amaethyddiaeth Cymru ar ei fwyaf effeithiol os caiff ei gyflwyno yn y Cynulliad nesaf. Mae'n bwysig deddfu unwaith a deddfu'n dda. Mae hwn yn gyfle i fod yn uchelgeisiol ac yn eang, gan fynd ymhellach na chynllun syml i gefnogi ffermydd ac ystyried materion fel hawliau ffermwyr tenant. Lansiais Ffermio Cynaliadwy a'n Tir ar 9 Gorffennaf sy'n nodi cynigion uchelgeisiol ar gyfer y dyfodol, gan gynnwys talu ffermwyr am y camau y maen nhw'n eu cymryd i ymateb i argyfwng yr hinsawdd, lleihau allyriadau a dal carbon. Gan ddefnyddio canlyniadau'r ymgynghoriad hwn, byddwn yn cyflwyno Papur Gwyn cyn diwedd y Cynulliad hwn i baratoi'r ffordd ar gyfer deddfwriaeth.

Hoffwn roi'r sicrwydd deddfwriaethol a geisir fel sail i'r ymrwymadau pendant y mae Gweinidogion eisoes wedi'u gwneud ar hyn. Felly, rydw i wedi gofyn i'r swyddogion fwrw ymlaen â chymal "machlud" fel bod y darpariaethau perthnasol ym Mil Amaethyddiaeth y DU yn dod i ben o ddiwedd 31 Rhagfyr 2024.

Cytundeb Sefydliad Masnach y Byd (WTO) ar Amaethyddiaeth

Rwy'n hapus i ddarparu'r sicrwydd pellach y gofynnwyd amdano am y Cytundeb Dwyochrog rhwng Llywodraethau'r DU a Chymru ar bwerau Sefydliad Masnach y Byd.

Mae cymal Sefydliad Masnach y Byd yn codi ystyriaethau cyfansoddiadol, cyfreithiol a pholisi pwysig a chymhleth. Mae'n cynnwys ardaloedd datganoledig a meysydd a gadwyd yn ôl. Mae polisi sy'n ymwneud â chysylltiadau rhyngwladol a rheoleiddio masnach ryngwladol wedi'i gadw yn ôl, tra bod polisi sy'n ymwneud ag amaethyddiaeth ac arsylwi a gweithredu rhwymedigaethau rhyngwladol, wedi'i ddatganoli ac o fewn cymhwysedd deddfwriaethol. Fel y dywedais o'r blaen, mae Llywodraeth Cymru a Llywodraeth y DU yn anghytuno ynglŷn â statws darpariaethau Sefydliad Masnach y Byd. Nid wyf yn barod i ildio safbwynt Llywodraeth Cymru ar y pwynt hwn, yn enwedig o ystyried y goblygiadau cyfansoddiadol ehangach. Fodd bynnag, rydw i wedi cytuno ar ffordd ymlaen gyda'r Ysgrifennydd Gwladol heb ymrwymiad ar y mater.

Yr hyn sy'n bwysig i mi yw sicrhau nad oes unrhyw gyfyngiadau ar gymhwysedd Llywodraeth Cymru. Mae fy negodiadau, felly, wedi canolbwyntio ar gryfhau'r mecanwaith llywodraethu sy'n sail i'r defnydd o gymal Sefydliad Masnach y Byd i anelu at gyflawni hyn.

Rydw i wedi trafod y mater hwn gyda'r Ysgrifennydd Gwladol sawl gwaith ac roeddwn yn glir iawn fod yr ymrwymiad i ymgynghori a gynigiwyd yn wreiddiol yn annerbyniol ac yn golygu y gellid defnyddio'r darpariaethau i gyfyngu ar gymhwysedd Cymru i lunio polisi amaethyddol. Yn yr un modd, roeddem yn cydnabod y byddai fetu unochrog dros y pŵer i wneud rheoliadau Sefydliad Masnach y Byd yn anodd i Lywodraeth y DU ei ildio, gan mai hi sy'n gyfrifol am gynrychioli gwledydd y Deyrnas Unedig yn Sefydliad Masnach y Byd. Fe wnaethom gytuno y dylai ein swyddogion datblygu ystod o opsiynau deddfwriaethol ac anneddfwriaethol i fynd i'r afael â'm pryderon ac y dylid datblygu'r opsiynau hyn o amgylch cyswllt y trafodaethau gyda Llywodraeth y DU ar Ddeddf yr Undeb Ewropeaidd (Ymadael) 2018 a arweiniodd at y Cytundeb Rhynglywodraethol ("IGA"). Yn gyffredinol, fy amcan negodi oedd sicrhau'r rôl gryfaf bosibl i Weinidogion Cymru yn y defnydd o'r pwerau.

Dyma'r hyn yr ydym wedi'i gyflawni. Drwy'r cytundeb, rydw i wedi sicrhau rôl gref iawn i Gymru yn y broses gychwynnol o lunio'r rheoliadau dan y cymal a'r defnydd parhaus o'r rheoliadau hynny. Mae hyn yn llawer cryfach na'r ymrwymiad wrth gychwyn yr ymgynghoriad ac mae'n cynnwys ymrwymiad penodol i'r Ysgrifennydd Gwladol symud ymlaen drwy gonsensws, wedi'i ategu gan fecanwaith clir a thryloyw. Er nad yw hyn yn amddiffyniad absoliwt, mae'n gosod y bar yn uchel iawn. Rwy'n cydnabod y gallai fod yna sefyllfaoedd lle mae'n anoddach dod o hyd i gonsensws a chynigiodd swyddogion Llywodraeth Cymru y mecanwaith ar gyfer datrys gwahaniaethau sy'n ffurfio rhan o'r Cytundeb. Mae hon yn system gadarn a thryloyw sy'n sicrhau bod barn y Gweinidogion yn cael ei hystyried yn briodol ac, yn bwysicaf oll, mae'n cynnwys hawl i droi at banel annibynnol neu Senedd y DU yn yr achosion mwyaf difrifol. Er enghraifft, os nad yw Llywodraeth Cymru yn cytuno ar reoliadau arfaethedig a bod Llywodraeth y DU yn penderfynu bwrw ymlaen â'r rheoliadau, rhaid i'r Ysgrifennydd Gwladol ddarparu datganiadau ysgrifenedig i Senedd y DU gan Lywodraeth y DU a Llywodraeth Cymru. Er nad yw'n fetto llwyr, byddai'n rhaid i ddau Dŷ Senedd y DU gytuno'n fwiadol i gymeradwyo'r rheoliadau gan ddiystyru gwrthwynebiadau'r Gweinidogion datganoledig ar sail gwybodaeth lawn. Os yw'n ddefnyddiol, gall swyddogion ystyried a ellid hysbysu'r Cynulliad a chael cyfle i wneud sylwadau ar is-ddeddfwriaeth wrth iddi gael ei pharatoi. Byddaf yn adolygu effeithiolrwydd y broses maes o law ac yn ystyried a oes angen unrhyw addasiadau i'w chryfhau.

Ardoll Cig Coch

Ar fy nghais, mae cymal newydd sy'n datrys y mater hirsefydlog o ddychwelyd ardoll cig coch wedi cael ei osod gan Lywodraeth y DU ac mae bellach yn rhan o'r Bil. Mae'r cymal newydd yn rhoi pwerau i Weinidogion, gan weithredu ar y cyd, i sefydlu cynllun sy'n mynnu bod byrddau amaethyddol ym Mhrydain yn ailddosbarthu'r ardoll rhyngddynt. Bydd swyddogion yn awr yn parhau i ddatblygu cynllun ochr yn ochr â'r ddeddfwriaeth sy'n mynd drwy Senedd y DU i sicrhau bod system deg ar waith cyn gynted â phosibl.

Cysylltiadau Rhyng-Sefydliadol a gweithio

Rydw i'n ystyried ystod o welliannau ac ymrwymadau posibl i roi dyletswyddau ychwanegol ar Lywodraeth Cymru a sicrhau rôl glir i'r Cynulliad wrth graffu ar is-ddeddfwriaeth.

Diweddariad ar Brexit a'n Tir a'r camau nesaf

Ar 9 Gorffennaf, lansiais yr ymgynghoriad ar Ffermio Cynaliadwy a'n Tir sy'n gofyn am eich barn ar ein cynigion polisi diwygiedig i gefnogi ffermwyr Cymru. Bydd yr ymgynghoriad yn para tan 30 Hydref 2019. Byddwn hefyd yn dechrau ar raglen cyd-ddylunio yn ddiweddarach yn y flwyddyn. Bydd hyn yn ein galluogi i archwilio rhai o agweddau ymarferol y cynllun arfaethedig mewn dull cydweithredol, na fyddai'n gwbl bosibl trwy ddefnyddio proses ymgynghori ysgrifenedig yn unig. Byddaf yn darparu'r llinell amser ddangosol ar gyfer datblygu systemau newydd arfaethedig ar ôl i mi gael mwy o eglurder ynghylch cyllid yn y dyfodol a dadansoddi'r ymatebion i'r ymgynghoriad. Hoffwn ddatgan eto na wneir unrhyw benderfyniadau ar gynlluniau'r dyfodol nes bod yr ymatebion i'r ymgynghoriad wedi'u hadolygu, y bydd Cynllun y Taliad Sylfaenol yn parhau heb ei newid hyd at a chan gynnwys 2020, ac na fydd y cynlluniau presennol yn cael eu dileu cyn y bydd unrhyw gynlluniau newydd yn barod.

Cyfarchion



Lesley Griffiths AC/AM

Gweinidog yr Amgylchedd, Ynni a Materion Gwledig
Minister for Environment, Energy and Rural Affairs

Ymateb Llywodraeth Cymru i Adroddiad y Pwyllgor Newid Hinsawdd, Amgylchedd a Materion Gwledig (a gyhoeddwyd ar 12 Chwefror 2019): Memorandwm Cydsyniad Deddfwriaethol Llywodraeth Cymru mewn perthynas â Bil Amaethyddiaeth y DU.

<p align="center">Argymhelliad/casgliad y Pwyllgor Newid Hinsawdd, Amgylchedd a Materion Gwledig (CCERA)</p>	<p align="center">Ymateb Llywodraeth Cymru</p>
<p>Argymhelliad y pwyllgor</p>	
<p>Rydym yn argymhell i'r Cynulliad ei fod yn rhoi cydsyniad i'r darpariaethau ym Mil Amaethyddiaeth y DU, yn amodol ar yr amodau canlynol –</p> <ul style="list-style-type: none"> • Dylai Llywodraeth Cymru geisio gwelliannau i Fil y DU i wireddu casgliadau 3, 4, 15, 19 a 21; a • Dylai Llywodraeth Cymru roi ymrwymadau i'r Cynulliad, neu eglurhad lle y bo'n briodol, mewn perthynas â'r materion a godwyd yng nghanasgliadau 1, 8, 9, 10, 11 a 18. 	<p>Nodwyd</p> <p>Rydw i'n cymryd pryderon y Pwyllgor o ddifrif ac rydw i wedi ymateb i bob casgliad lle'r ydw i mewn sefyllfa i wneud hynny. Mae swyddogion yn parhau i weithio ar becyn i fynd i'r afael â phryderon y Pwyllgor a byddaf yn darparu rhagor o wybodaeth maes o law.</p>
<p>Casgliadau'r Pwyllgor</p>	
<p>Yr angen am ddeddfwriaeth a'r ymagwedd a gymerwyd</p>	
<p>Casgliad 1</p> <p>Rydym o'r farn mai'r ffordd fwyaf priodol o ddeddfu ar bwnc mor arwyddocaol â dyfodol hirdymor amaethyddiaeth yng Nghymru yw Bil Cynulliad. Rydym o'r farn y dylai Llywodraeth Cymru roi ymrwymiad y bydd amser ar gael yn y rhaglen deddfwriaethol i gyflwyno Bil Amaethyddiaeth Cymru a'i basio cyn diwedd tymor y Cynulliad hwn</p>	<p>Derbyn</p> <p>Rwy'n cadarnhau fy mod yn parhau'n ymrwymedig i Fil Amaethyddiaeth Cymru.</p> <p>Rhoddodd y Prif Weinidog ddiweddariad ar hyn yn ei ddatganiad ar raglen deddfwriaethol y Llywodraeth. Bydd Bil Amaethyddiaeth Cymru ar ei fwyaf effeithiol os caiff ei gyflwyno yn y Cynulliad nesaf. Mae'n bwysig deddfu unwaith a deddfu'n dda. Mae hwn yn gyfle i fod yn uchelgeisiol ac yn eang, gan fynd ymhellach na chynlluniau syml i roi cymorth i ffermydd i edrych ar faterion fel hawliau ffermwyr tenant. Lansiais Ffermio Cynaliadwy a'n Tir ar 9 Gorffennaf. Gan ddefnyddio canlyniadau'r ymgynghoriad hwn, byddwn yn cyflwyno Papur Gwyn cyn diwedd y Cynulliad hwn i baratoi'r ffordd ar gyfer deddfwriaeth.</p>
<p>Casgliad 2</p> <p>Rydym yn cydnabod bod angen deddfwriaeth yn y tymor byr, i barhau i roi cymorth ariannol i'r sector amaethyddiaeth yn syth ar ôl Brexit. O ystyried yr amser sydd ar gael, mae Bil y DU yn gyfrwng priodol at y diben hwn. Ond, mae'r darpariaethau ym Mil y Deyrnas Unedig yn mynd ymhell y tu hwnt i sicrhau parhad uniongyrchol cymorth ariannol. Maent yn galluogi Gweinidogion Cymru i sefydlu ymagwedd hollol newydd at gymorth i amaethyddiaeth.</p>	<p>Nodwyd</p> <p>Nodaf bryderon y Pwyllgor. Mae Brexit wedi creu ansicrwydd digyffelyb ac mae'n hanfodol sicrhau bod deddfwriaeth yn ei lle mewn da bryd fel y gallwn ddechrau symud i systemau cymorth newydd wrth i'r DU adael y Polisi Amaethyddol Cyffredin. Yn ogystal â chymryd pwerau parhad, rydw i felly wedi penderfynu cymryd pwerau i ganiatáu diwygio cyfraith yr UE a gadwyd ac i'n galluogi i bontio i gynlluniau newydd, yn amodol ar ymgynghori, fel na fydd ffermwyr Cymru dan anfantais.</p>

	<p>Gwneuthum ddatganiad ysgrifenedig ar 21 Mawrth, cyhoeddwyd fy Natganiad yn y Gwanwyn ar 7 Mehefin, a lansiodd yr ymgynghoriad ar Ffermio Cynaliadwy a'n Tir ar 9 Gorffennaf i geisio barn ar ein cynigion polisi diwygiedig i gefnogi ffermwyr Cymru. Bydd yr ymgynghoriad yn para tan 30 Hydref 2019. Byddwn hefyd yn dechrau ar raglen cyd-ddylunio yn ddiweddarach yn y flwyddyn. Bydd hyn yn ein galluogi i archwilio rhai o agweddau ymarferol y cynllun arfaethedig mewn dull cydweithredol, na fyddai'n gwbl bosibl trwy ddefnyddio proses ymgynghori ysgrifenedig yn unig. Bydd yr ymatebion i'r ddogfen ymgynghori a'r rhaglen gyd-gynllunio yn cael eu hystyried yn ofalus a byddwn wedyn yn pennu ac yn nodi'r camau nesaf ar ôl i ni allu ystyried yr holl ymatebion i'r ymgynghoriad yn llawn ac yng ngoleuni datblygiadau Brexit dros ystod y misoedd nesaf. Rydw i wedi dweud yn glir:</p> <ul style="list-style-type: none"> • Na wneir unrhyw benderfyniadau ar gynlluniau'r dyfodol hyd nes y bydd yr ymatebion i'r ymgynghoriad wedi'u hadolygu a bod yr holl ystyriaethau perthnasol eraill wedi'u hystyried; • Na wneir unrhyw newidiadau i'r cynllun taliad sylfaenol presennol hyd nes y bydd yr ymatebion i'r ymgynghoriad wedi'u hystyried. I adlewyrchu hyn, rydw i eisoes wedi cyhoeddi y bydd Cynllun y Taliad Sylfaenol (BPS) yn parhau'n ddigynffwrdd hyd at ac yn cynnwys 2020, ac mae rhai deiliaid contract Glastir wedi cael cynnig i adnewyddu contractau hyd at 2021. Felly, ni fydd y broses pontio i unrhyw gynlluniau newydd a gyflwynaf yn dechrau tan o leiaf 2021. • Ni fydd cynlluniau sy'n bodoli eisoes yn cael eu dileu cyn bod unrhyw gynlluniau newydd yn barod. <p>Rydw i wedi rhoi cyfarwyddyd i swyddogion i symud cymal "machlud" yn ei flaen fel bod y darpariaethau perthnasol yn y Bil yn dod i ben o ddiwedd 31 Rhagfyr 2024. Gobeithio y bydd hyn yn rhoi sicrwydd pellach i'r Pwyllgor mai pwerau dros dro fydd y rhai a fydd yn mynd drwy Fil y DU.</p>
<p>Casgliad 3</p> <p>Rydym o'r farn bod darpariaethau ar gyfer Cymru yn y Bil yn anghytbwys. Maent yn rhoi pwerau sylweddol i Weinidogion Cymru ond nid ydynt yn rhoi unrhyw ddyletswydd arnynt. Effaith y darpariaethau fydd cyfyngu'n ddifrifol ar allu'r Cynulliad i graffu ar gymorth Llywodraeth Cymru</p>	<p>Derbyn yn rhannol</p> <p>Nodaf bryderon y Pwyllgor ynglŷn â hyn. Rydw i wedi ymrwmo i'r egwyddor o dryloywder a rôl ddilys y Cynulliad Cenedlaethol wrth graffu ar bolisi. Mae swyddogion yn ystyried a ellir rhoi sicrwydd pellach i wella'r broses graffu. Gallai hyn fod drwy ddiwygio'r Bil neu drwy gyhoeddi</p>

<p>ar gyfer amaethyddiaeth, ar adeg pan fydd craffu effeithiol yn hanfodol i lwyddiant y polisiau newydd. Nid yw hon yn ymagwedd dderbyniol, a dylai fod yn fater o bryder difrifol i'r Cynulliad. Rydym o'r farn y dylid diwygio Atodlen 3 i gynnwys mesurau diogelu ychwanegol er mwyn sicrhau bod y pwerau gweithredol yn cael eu harfer yn gymesur ac yn briodol. Gallai hyn gynnwys gofyniad ar Weinidogion Cymru i ymgynghori cyn cyflwyno rheoliadau.</p>	<p>ymrwymiad clir i gyflwyno adroddiad i'r Cynulliad neu i ymgynghori arno ar reoliadau neu gynlluniau drafft. Gall fy swyddogion ddarparu sesiwn frifio breifat ar hyn os byddai hynny'n ddefnyddiol i chi.</p>
<p>Casgliad 4</p> <p>Addawodd Ysgrifennydd y Cabinet yn Brexit a'n Tir bod y darpariaethau ym Mil y Deyrnas Unedig yn gyfystyr â threfniadau trosiannol a fydd yn "gyfyngedig o ran amser". Nid oes cyfyngiadau o'r fath wedi eu cynnwys ym Mil y Deyrnas Unedig, fel y'i drafftwyd. Rydym o'r farn y dylai Llywodraeth Cymru geisio gwelliant i Fil y Deyrnas Unedig er mwyn cyflwyno "cymal machlud" mewn perthynas â darpariaethau Cymru.</p>	<p>Derbyn</p> <p>Rwy'n cadarnhau fy mod yn parhau'n ymrwymedig i gyflwyno Bil Amaethyddiaeth Cymru a rhoddodd y Prif Weinidog ddiweddariad ar hyn fel rhan o'i ddatganiad blynyddol ar y Rhaglen Ddeddfwriaethol ar 16 Gorffennaf. Rydw i wedi gwrando'n astud ar bryderon Pwyllgorau'r Cynulliad ynglŷn â diffyg cymal "machlud". Rydw i wedi rhoi cyfarwyddyd i swyddogion symud cymal "machlud" yn ei flaen fel bod y darpariaethau perthnasol yn y Bil yn dod i ben o ddiwedd 31 Rhagfyr 2024. Mae swyddogion yn gweithio gyda'r Cwnsler Seneddol a Llywodraeth y DU i baratoi darpariaeth addas sy'n rhoi'r sicrwydd deddfwriaethol a geisir gan y pwyllgorau yn ogystal â'r ymrwymiad pendant a roddwyd eisoes y bydd Llywodraeth Cymru yn cyflwyno Bil Amaethyddiaeth Cymru.</p> <p>Fy mwriad yw bod y ddarpariaeth hon yn cael ei chyflwyno fel gwelliant gan y Llywodraeth.</p>
<p>Casgliad 5</p> <p>Yn sgil digwyddiadau diweddar yn San Steffan, dylai Llywodraeth Cymru ystyried yr angen am fesurau wrth gefn priodol i sicrhau y gellir rhoi cymorth ariannol i'r sector amaethyddol yn syth ar ôl Brexit.</p>	<p>Derbyn</p> <p>Mae Llywodraeth Cymru wedi gwneud gwaith helaeth i sicrhau bod deddfwriaeth yn ei lle. Mae llawer o'r blociau adeiladu deddfwriaethol yn eu lle ac mae deddfwriaeth yn ei lle i ganiatáu i daliadau i ffermwyr barhau os yw'r DU yn gadael yr UE heb gytundeb yn ei le.</p>
<p>Gadael y Polisi Amaethyddol Cyffredin</p>	
<p>Casgliad 6</p> <p>Mae hwn yn gyfnod o ansicrwydd sylweddol i'r sector amaeth yng Nghymru. Rydym yn cydnabod pam mae'r sector wedi ymateb yn bryderus i'r cynigion i ddirwyn taliadau uniongyrchol i ben. O ystyried yr amser sydd ar gael, rydym yn cefnogi cynnwys darpariaethau ym Mil y Deyrnas Unedig i barhau â thaliadau uniongyrchol yn syth ar ôl Brexit. Rydym o'r farn y bydd hyn yn rhoi sicrwydd i'r sector.</p>	<p>Derbyn mewn egwyddor</p> <p>Rydw i wedi cyhoeddi y bydd Cynllun y Taliad Sylfaenol (BPS) yn parhau'n ddigyfnewid hyd at ac yn cynnwys 2020. Lansiais yr ymgynghoriad ar Ffermio Cynaliadwy a'n Tir ar 9 Gorffennaf i geisio barn ar ein cynigion polisi diwygiedig i gefnogi ffermwyr Cymru. Bydd yr ymgynghoriad yn para tan 30 Hydref 2019. Rhoddir rhagor o wybodaeth yn fy ymateb i gasgliad 2.</p>
<p>Casgliad 7</p>	<p>Gwrthod</p>

<p>Mae Ysgrifennydd y Cabinet wedi dweud na fydd unrhyw benderfyniad polisi yn cael ei gymryd nes bydd canlyniadau ymgynghoriad <i>Brexit a'n tir</i> yn hysbys. Mae Ysgrifennydd y Cabinet hefyd wedi dweud ei bod hi'n bwriadu dirwyn taliadau uniongyrchol i ben. Nid yw'r ddau safbwynt hyn yn gydnaws.</p>	<p>Nodaf bryderon y Pwyllgor ond nid wyf yn cytuno bod fy safbwynt datganedig yn anghydnaws. Pan fydd y DU yn gadael yr Undeb Ewropeaidd (UE), bydd y polisi amaethyddol cyffredin (PAC) – gan gynnwys Cynllun y Taliad Sylfaenol – yn dod i ben yng Nghymru. Mae angen i ni benderfynu sut i gefnogi ffermwyr ar ôl Brexit. Rhoddir rhagor o wybodaeth yn fy ymateb i gasgliad 2.</p>
<p>Casgliad 8</p> <p>Nid yw Llywodraeth Cymru wedi cynnal asesiad o effaith dirwyn taliadau uniongyrchol i ben. Rydym o'r farn y dylai Llywodraeth Cymru roi ymrwymiad i beidio â dechrau dirwyn taliadau uniongyrchol i ben nes daw'r amser y bydd wedi cwblhau a chyhoeddi asesiad effaith manwl ar draws y sector.</p>	<p>Derbyn</p> <p>Yn fy natganiad yn y gwanwyn ar 7 Mehefin, ymrwymais i gynnal y modelu a'r asesiadau effaith angenrheidiol cyn cwblhau'r cynigion. Cyhoeddais y pecyn tystiolaeth, 'Amaethyddiaeth yng Nghymru' fel y cam cyntaf yn y dasg hon. Mae'n nodi gwybodaeth sy'n berthnasol i Gynllun y Taliad Sylfaenol i ganiatáu i effaith polisi newydd gael ei hasesu o'i chymharu â'r sefyllfa bresennol. Rwy'n bwriadu llunio cyfres o fodolau fferm cynrychioliadol i amcangyfrif yr ystod o effeithiau ariannol ac economaidd a gaiff ein cynigion ar ffermydd o wahanol fathau, meintiau a lleoliadau yng Nghymru. Bydd y gwaith hwn yn cyfrannu at ystod ehangach o asesiadau effaith a fydd yn cael eu cynnal maes o law.</p>
<p>Casgliad 9</p> <p>Mae Llywodraeth Cymru wedi gofyn am gynnwys pwerau gweithredol eraill o dan Ran 2 o Atodlen 3. Er enghraifft, y darpariaethau sy'n ymwneud â thaliadau wedi eu datgysylltu. Nid yw Llywodraeth Cymru wedi darparu gwybodaeth i'r Cynulliad ynghylch sut mae'n bwriadu defnyddio'r pwerau hyn, pe bai'r Cynulliad yn rhoi caniatâd. Dylai Llywodraeth Cymru egluro sut mae'n bwriadu defnyddio'r pwerau hyn.</p>	<p>Derbyn</p> <p>Rydw i wedi adolygu'r holl bwerau a gweithdrefnau. Mae Llywodraeth Cymru a Defra yn gweithio gyda'i gilydd i fynd i'r afael â phryderon ar draws y Bil. Mae'r gwaith hwn yn mynd rhagddo a byddaf yn rhoi'r wybodaeth y gofynnir amdani i'r Cynulliad cyn gynted ag y byddaf mewn sefyllfa i wneud hynny. Gall fy swyddogion ddarparu sesiwn friffio breifat ar hyn os byddai hynny'n ddefnyddiol i chi.</p>
<p>Pontio i system newydd o gymorth</p>	
<p>Casgliad 10</p> <p>Nid yw Llywodraeth Cymru wedi rhoi eglurder i'r Cynulliad ynghylch y man cychwyn na'r amserlen ar gyfer pontio o'r trefniadau presennol i gynlluniau yn y dyfodol. Yn <i>Brexit a'n tir</i>, dywedodd Llywodraeth Cymru mai ei huchelgais oedd i'r cyfnod pontio ddechrau yn 2020 a chael ei gwblhau erbyn 2025. Yn fwy diweddar, dywedodd Ysgrifennydd y Cabinet y byddai taliadau uniongyrchol yn cael eu gwneud, heb eu newid, ar gyfer blwyddyn dalu 2020 y PAC.</p> <p>Rydym o'r farn bod yn rhaid i Lywodraeth Cymru egluro ei bwriadau mewn perthynas â phryd bydd y cyfnod pontio yn dechrau a beth fydd hynny'n ei olygu i'r sector yn ymarferol.</p>	<p>Gwrthod</p> <p>Mae'r sefyllfa ddiweddaraf o ran pontio wedi'i nodi ym Mhennod 8 <i>Ffermio Cynaliadwy a'n Tir</i>. Roedd <i>Brexit a'n Tir</i> yn ymgynghori ar amserlen uchelgeisiol i symud o'r cynlluniau presennol i gynlluniau newydd erbyn 2025. Ym mis Rhagfyr 2018, cyhoeddais y byddai Cynllun y Taliad Sylfaenol yn aros yn ei le ar gyfer 2020. Ers hynny, mae maint yr ansicrwydd ynghylch Brexit wedi cynyddu. Mae hyn yn llesteirio ein gallu i gynllunio cymorth i ffermydd yn y dyfodol yng Nghymru.</p> <p>Rwy'n parhau i gynnig cyfnod pontio aml-flwyddyn. Fodd bynnag, o ystyried yr ansicrwydd parhaus ynghylch Brexit, ni allaf ymgynghori ar</p>

	<p>gyfnod penodol o amser. Pan fydd mwy yn hysbys, byddaf yn gwneud datganiad pellach. Hyd nes y bydd yr ansicrwydd yn cilio, byddaf yn canolbwyntio'r drafodaeth ar y ffordd orau o gynllunio'r broses bontio.</p> <p>Rydw i wedi rhoi gwybod yn llawn i'r Cynulliad am fy nghynlluniau. Ers cyhoeddi <i>Brexit a'n Tir</i>, rydw i wedi cynnal rhaglen ymgysylltu helaeth. Rydw i wedi gwrandao ac ymateb i adborth i ddatblygu polisi ac wedi diweddarau'r Cynulliad wrth i benderfyniadau gael eu gwneud.</p>
<p>Casgliad 11</p> <p>Pa un ai a yw'n dymuno dechrau pontio yn 2020, 2021 neu, yn wir, yn ddiweddarach, mae Llywodraeth Cymru yn wynebu heriau sylweddol, o gofio y bydd angen ymgymryd â gwaith modelu manwl, asesiadau effaith a sefydlu cynlluniau peilot yn gyntaf i lywio'r gwaith o ddatblygu a gweithredu'r cynlluniau newydd.</p> <p>Rydym o'r fam y dylai Llywodraeth Cymru roi ymrwymiad na fydd y broses o drosglwyddo i gynlluniau newydd yn dechrau nes i'r gwaith hwn gael ei gwblhau.</p>	<p>Derbyn</p> <p>Rhoddir rhagor o wybodaeth yn fy ymateb i gasgliad 2.</p> <p>Rydw i wedi ymrwymo o hyd i gynnal y modelu a'r asesiadau effaith angenrheidiol cyn gwneud penderfyniadau terfynol. Mae'r gwaith hwn yn cynnwys nifer o gamau, ac mae rhai ohonynt eisoes wedi'u cwblhau ac mae angen datblygu rhai ohonynt. Nodir y gwaith hwn yn Atodiad A (Dull Dadansoddol) i <i>Ffermio Cynaliadwy a'n Tir</i>.</p> <p>Byddaf yn parhau i ystyried rôl prosiectau peilot. Mae'n bwysig nodi nad ydym yn dechrau o dudalen wag, gan fod gennym dros 20 mlynedd o ddarpariaeth amaeth-amgylchedd i ddysgu ohono. O ystyried y sylfaen hon o dystiolaeth sy'n bodoli eisoes, efallai mai'r peth mwyaf priodol fyddai targedu cynlluniau peilot ar yr agweddau ymarferol o gyflwyno cynllun. Mae'r rhaglen cyd-ddylunio yn gam cyntaf pwysig.</p>
<p>System newydd o gymorth ariannol</p>	
<p>Casgliad 12</p> <p>Mae Ysgrifennydd y Cabinet wedi dweud na fydd unrhyw benderfyniad yn cael ei gymryd ar fanylion y system gymorth ariannol newydd nes bydd canlyniad ymgynghoriad <i>Brexit a'n tir</i> yn hysbys. Gan hynny, nid yw Llywodraeth Cymru mewn sefyllfa i egluro i'r Cynulliad yn fanwl y dibenion y bydd y pwerau hyn yn cael eu defnyddio ar eu cyfer.</p>	<p>Derbyn mewn egwyddor</p> <p>Rwy'n nodi pryderon y Pwyllgor, ond mae Brexit wedi creu ansicrwydd digyffelyb. Rydw i am sicrhau bod deddfwriaeth yn ei lle mewn da bryd fel bod y DU yn gadael y Polisi Amaethyddol Cyffredin ac yn gallu dechrau symud i systemau cymorth newydd unwaith y bydd mwy o ymgynghori, modelu a phob asesiad effaith wedi'u cynnal a phenderfyniadau wedi'u gwneud.</p> <p>Byddaf yn darparu'r wybodaeth hon maes o law.</p>
<p>Casgliad 13</p> <p>Mae Ysgrifennydd y Cabinet wedi nodi, os bydd Llywodraeth Cymru, o ganlyniad i dreialu a modelu, yn penderfynu bod y cynlluniau a gynigir</p>	<p>Mae hyn yn gywir ac yn dod o dan fy ymateb i gasgliad 12.</p>

<p>yn <i>Brexit a'n tir</i> yn amhriodol, bydd ymagweddau eraill yn cael eu hystyried a'u datblygu. Mae hyn yn golygu, mewn gwirionedd, y gellir defnyddio'r darpariaethau at ddibenion sy'n anhysbys ar hyn o bryd.</p>	
<p>Casgliad 14</p> <p>Bydd Bil y Deyrnas Unedig yn galluogi Gweinidogion Cymru i gyflwyno system newydd o gymorth ariannol ar gyfer amaethyddiaeth, ar ôl 40 mlynedd o'r PAC. Nid yw'r darpariaethau, fel y'u drafftwyd, yn cynnwys unrhyw rôl oruchwylio na monitro i'r Cynulliad wrth sefydlu neu weithredu'r system gymorth ariannol newydd. Nid ydym o'r farn bod hyn yn briodol mewn meysydd allweddol o gyfrifoldeb datganoledig. Dyma'r tro cyntaf, ers datganoli, i Gymru gael cyfle i lunio ei pholisi ei hun yn y maes hwn, ac mae'n iawn fod y Cynulliad yn chwarae rôl lawn yn hyn o beth.</p>	<p>Derbyn yn rhannol</p> <p>Ymdrinnir â hyn yn fy ymateb i gasgliad 3. Gall fy swyddogion ddarparu sesiwn friffio breifat ar y materion sy'n destun trafodaeth o hyd os byddech yn gweld hynny'n ddefnyddiol.</p>
<p>Casgliad 15</p> <p>Dylai Llywodraeth Cymru geisio diwygiadau i Fil y Deyrnas Unedig i'w gwneud yn ofynnol: mai dim ond drwy gynlluniau a sefydlir gan Reoliadau y gellir rhoi cymorth ariannol dan Ran 1; y dylai'r Rheoliadau hyn fod yn ddarostyngedig i'r weithdrefn gadarnhaol; a bod yn rhaid i Lywodraeth Cymru adrodd i'r Cynulliad yn flynyddol ar effeithiolrwydd unrhyw gynllun a sefydlwyd.</p>	<p>Derbyn yn rhannol</p> <p>Rydw i wedi ystyried hyn yn ofalus ond rwy'n parhau i gredu bod Bil fframwaith yn gyfrwng deddfwriaethol mwy addas i fod yn sail i bolisi amaethyddol yn y dyfodol. Rydym am symud oddi wrth fiwrocratiaeth a chymhlethdod rheoliadau'r UE sydd wedi ein cyfyngu yn y gorffennol. Rwy'n bwriadu parhau i gyd-ddylunio rhaglen rheoli tir yn y dyfodol. Bydd hyn yn ein galluogi i archwilio rhai o'r agweddau ymarferol ar ganlyniadau arfaethedig y cynllun mewn dull cydweithredol na fyddai'n gwbl bosibl o ddefnyddio proses ymgynghori ysgrifenedig yn unig.</p> <p>Mae swyddogion yn ystyried a ellir rhoi sicrwydd pellach i wella'r broses graffu. Gallai hyn fod drwy ddiwygio'r Bil neu drwy gyhoeddi ymrwymiad clir i gyflwyno adroddiad neu i ymgynghori â'r Cynulliad. Gall fy swyddogion ddarparu sesiwn friffio breifat ar hyn os byddai hynny'n ddefnyddiol i chi.</p>
<p>Casgliad 16</p> <p>Ni fu unrhyw asesiad o effaith ariannol y penderfyniad i ehangu mynediad at gynlluniau yn y dyfodol. Gan hynny, nid yw Llywodraeth Cymru mewn sefyllfa i esbonio i'r Cynulliad pa effaith y bydd y penderfyniad hwn yn ei chael ar ffermwyr. Fel y cyfeirir ato mewn casgliadau blaenorol, credwn na ddylai Llywodraeth Cymru ddechrau trosglwyddo i'r cynlluniau newydd nes iddi gynnal asesiad o effaith ehangu mynediad at gymorth ariannol a chyhoeddi'r canlyniadau.</p>	<p>Derbyn</p> <p>Rydw i wedi nodi'r cynllun ar gyfer asesiadau effaith yn y dyfodol yn fy ymateb i gasgliad 8.</p>
<p>Cyllid ar gyfer polisi amaethyddol yn y dyfodol</p>	
<p>Casgliad 17</p>	<p>Derbyn</p>

<p>Nid yw cenhedloedd cyfansoddol y Deyrnas Unedig wedi dod i gytundeb eto ar drefniadau cyllido amaethyddiaeth yn y Deyrnas Unedig ar gyfer 2020-2022. At hynny, nid oes eglurder o ran trefniadau cyllido mwy hirdymor. Rhaid sefydlu mecanwaith rhynglywodraethol newydd i sicrhau cytundeb cynaliadwy, hirdymor ar gyfer cyllido amaethyddiaeth a rheoli tir yn y Deyrnas Unedig.</p>	<p>Mae Gweinidogion wedi bod yn glir na ddylem gael ceiniog yn llai pan fyddwn yn gadael yr UE ac y dylem gael hyblygrwydd llawn ynghylch sut y caiff arian ei wario. Mae hyn yn cyd-fynd ag ymrwymiad y maniffesto yn 2017 i gynnal ariannu ffermydd ar y lefelau presennol. Rydym yn parhau i geisio ymrwymiad pendant gan Lywodraeth y DU i ddatblygu'r holl drefniadau ariannu yn y dyfodol ar ôl i ni adael yr UE mewn partneriaeth, nid yn unig y trefniadau ar gyfer cyllid amaethyddiaeth yn y dyfodol.</p>
<p>Casgliad 18</p> <p>Nid yw Llywodraeth Cymru wedi darparu unrhyw wybodaeth ariannol i'r Cynulliad mewn perthynas â chostau cyflwyno cynlluniau newydd, ac eithrio dweud na fydd "goblygiadau ariannol uniongyrchol". Mae Llywodraeth y Deyrnas Unedig wedi dweud bod pwerau cyfatebol i'r Ysgrifennydd Gwladol yn debygol o arwain at "wariant sylweddol". Dylai Llywodraeth Cymru ymrwymo i gyhoeddi, cyn sefydlu cynlluniau newydd, asesiad effaith rheoleiddiol llawn o'r cynigion, a ddylai gynnwys asesiad manwl o gostau ac asesiad o ran nodau llesiant, ond ni ddylid cyfyngu'r asesiad i hynny'n unig.</p>	<p>Derbyn</p> <p>Rydw i wedi nodi'r cynllun ar gyfer asesiadau effaith yn y dyfodol yn fy ymateb i gasgliad 8.</p>
<p>Cytundeb Amaethyddiaeth Sefydliad Masnach y Byd</p>	
<p>Casgliad 19</p> <p>Rydym yn rhannu pryderon rhanddeiliaid am oblygiadau posibl y darpariaethau yng nghymal 26 mewn perthynas â Sefydliad Masnach y Byd, a'u potensial i gyfyngu ar Lywodraeth Cymru mewn meysydd datganoledig. Rydym o'r farn y dylid mynd i'r afael â hyn naill ai drwy welliant i Fil y Deyrnas Unedig neu, ar y lleiaf, gytundeb ffurfiol wedi ei gyhoeddi rhwng Llywodraeth y Deyrnas Unedig a Llywodraeth Cymru.</p>	<p>Derbyn</p> <p>Mae'r casgliad hwn wedi'i oddiweddyd gan gasgliad 2 adroddiad y Pwyllgor ar y Memorandwm Cydsyniad Deddfwriaethol Atodol a darperir ymateb ar wahân.</p>
<p>Casgliad 20</p> <p>Mae angen dybryd am fecanwaith rhynglywodraethol ffurfiol ar lefel Weinidogol i ddatrys anghydfodau a allai godi mewn perthynas â gweithredu polisi amaethyddiaeth yn y Deyrnas Unedig yn y dyfodol. Dylai hwn fod yn fodel o lywodraethu ar y cyd yn seiliedig ar gydraddoldeb parch.</p>	<p>Derbyn mewn egwyddor</p> <p>Gwneuthum ddatganiad ysgrifenedig ar 21 Mawrth a oedd yn cynnwys manylion y Cytundeb Dwyochrog gyda Llywodraeth y DU ar ddarpariaethau Sefydliad Masnach y Byd yn y Bil. Rydw i o'r farn bod hon yn fecanwaith cadarn a thryloyw i gynnwys Gweinidogion Cymru yn y broses o wneud penderfyniadau yn ogystal â bod yn fecanwaith ar gyfer datrys anghydfodau. Mae'r cytundeb dwyochrog yn nodi y bydd rôl i gyngor annibynnol fel arfer pe bai'r llywodraethau'n anghytuno ar ddsbarthiad priodol cynlluniau neu faterion perthnasol eraill. Dylai'r Ysgrifennydd Gwladol ystyried y cyngor hwn cyn gwneud unrhyw benderfyniad a bydd yn rhannu'r cyngor, y penderfyniad a'r rheswm dros wneud penderfyniad gyda'r gweinyddiaethau</p>

	<p>datganoledig. Y bwriad clir yw ceisio cytundeb. Fodd bynnag, lle nad yw hyn yn ymarferol, mae yna fecanweithiau cryf i Weinidogion Cymru fynegi eu barn.</p> <p>Bydd y trefniadau hyn yn cael eu codio mewn Memorandwm Cyd-ddealltwriaeth, a bydd Ysgrifennydd Gwladol Llywodraeth y DU dros yr Amgylchedd, Pysgodfeydd a Materion Gwledig yn rhoi hyn ar glawr mewn datganiad ar lawr Tŷ'r Cyffredin.</p>
Darpariaethau eraill y ceisir cydsyniad ar eu cyfer	
Casgliad 21	Nodwyd
<p>Rydym yn cytuno mewn egwyddor â'r darpariaethau a amlinellir yn yr adran hon o'r adroddiad. Fodd bynnag, rydym o'r farn nad yw Llywodraeth Cymru wedi darparu gwybodaeth i egluro'n fanwl y dibenion y bydd yn defnyddio'r darpariaethau ar eu cyfer. Mae'r rhain yn bwerau gweithredol helaeth, a dylai Llywodraeth Cymru egluro eu pwrpas a'u heffaith arfaethedig. Rydym yn ailadrodd ein sylwadau ynghylch yr angen am gynnwys mesurau diogelu yn Atodlen 3 er mwyn sicrhau bod y pwerau hyn yn cael eu harfer yn briodol ac yn gymesur.</p>	<p>Rwy'n cytuno'n llwyr y dylai Llywodraeth Cymru ddarparu rhagor o wybodaeth am ddiben ac effaith arfaethedig y pwerau. Rwy'n bwriadu rhoi enghreifftiau o sut gallai'r darpariaethau gael eu defnyddio ynghyd â gwybodaeth arall y gofynnir amdani. Mae'r gwaith hwn yn mynd rhagddo a byddaf yn rhoi'r wybodaeth y gofynnir amdani i'r Cynulliad cyn gynted ag y byddaf mewn sefyllfa i wneud hynny.</p>
Casgliad 22	Derbyn
<p>Rydym yn cytuno â'n rhanddeiliaid ynghylch yr angen am "gydweithrediad a chytundeb" rhwng cenhedloedd cyfansoddol y Deyrnas Unedig wrth arfer y pwerau hyn. Mae hyn yn arbennig o bwysig mewn perthynas â safonau iechyd anifeiliaid ac ymyrraeth yn y farchnad. Rhaid ymdrin â hyn drwy fecanwaith rhynglywodraethol, ffurfiol, fel y nodwyd yn gynharach yn yr adroddiad hwn.</p>	<p>Rydw i'n croesawu'r adolygiad o gysylltiadau rhynglywodraethol. Mae hyn yn cael ei oruchwylio gan fwrdd prosiect o uwch swyddogion o Lywodraethau Cymru a'r Alban, Gweithrediaeth Gogledd Iwerddon, a Swyddfa'r Cabinet. Mae gan yr adolygiad bum ffrwd waith - egwyddorion; llywodraethu fframweithiau cyffredin; datrys anghydfodau; ymgysylltu rhyngwladol; a pheirianwaith.</p> <p>Mae cynnydd da yn cael ei wneud o ran datblygu'r fframweithiau cyffredin a fydd yn gwreiddio'r mathau newydd o gydweithredu rhynglywodraethol. Rwy'n bwriadu darparu rhagor o fanylion yn fuan.</p>

Ymateb Llywodraeth Cymru i adroddiad y Pwyllgor Newid Hinsawdd, Amgylchedd a Materion Gwledig (a gyhoeddwyd ym mis Mehefin 2019) ar Femorandwm Cydsyniad Deddfwriaethol Atodol Llywodraeth Cymru ar y Bil Amaethyddiaeth

Argymhelliad 1	Nodwyd
<p>Rydym yn croesawu'r ffaith bod darpariaethau'r ardoll cig coch (cymal 29 newydd) wedi'u cynnwys yn y Bil. Rhaid i Lywodraeth Cymru roi ymrwymiad na fydd yn defnyddio'r cynnydd yn y derbyniadau sy'n deillio o ail-wladoli'r ardoll i ddisodli'r cyllid a ddarperir ar hyn o bryd gan Lywodraeth Cymru i Hybu Cig Cymru.</p>	<p>Nid wyf yn bwriadu defnyddio'r gwaith o ddiwygio'r system Ardoll Cig Coch i newid y ffordd y mae Llywodraeth Cymru yn ariannu gweithrediadau Hybu Cig Cymru. Ar hyn o bryd, defnyddir derbynebau ardollau ar gyfer yr amcanion a nodir ym Mesur Diwydiant Cig Coch (Cymru) 2010 ac nid yw'r diwygiadau</p>

	<p>arfaethedig i'r system ardollau yn newid yr amcanion hyn. Defnyddir y cyllid a ddarperir gan Lywodraeth Cymru i Hybu Cig Cymru i ddarparu gwasanaethau sy'n mynd y tu hwnt i'r cyfrifoldebau ardoll craidd fel y nodir ym Mesur Diwydiant Cig Coch (Cymru) 2010. Ar hyn o bryd fy mwriad yw i'r arian hwn barhau.</p>
<p>Argymhelliad 2</p> <p>Dylai Llywodraeth Cymru geisio cytundeb Llywodraeth y DU i ddiwygio'r Bil i fynd i'r afael â phryderon y Pwyllgor mewn perthynas â chymal 28.</p>	<p>Gwrthod</p> <p>Gwneuthum Ddatganiad Ysgrifenedig ar 21 Mawrth a oedd yn cynnwys manylion y Cytundeb Dwyochrog gyda Llywodraeth y DU. Rydw i o'r farn bod hon yn fecanwaith cadarn a thryloyw i gynnwys Gweinidogion Cymru yn y broses o wneud penderfyniadau yn ogystal â bod yn fecanwaith ar gyfer datrys anghydfodau. Bydd yr Ysgrifennydd Gwladol dros yr Amgylchedd, Pysgodfeydd a Materion Gwledig yn cofnodi hyn mewn datganiad ar lawr Tŷ'r Cyffredin. Nid wyf yn cytuno bod angen diwygio'r Bil.</p> <p>Nodaf bryderon pellach y Pwyllgor a wnaed yn yr adroddiad ar y Memorandwm Cydsyniad Deddfwriaethol Atodol. Rwy'n parhau i gredu, fodd bynnag, bod hyn yn ganlyniad da na ddylai gyfyngu ar gymhwysedd Cymru i lunio polisïau a deddfwriaeth amaethyddol.</p>